

東川劉文簡公集

東川劉文簡公集卷之十八

誌銘

封戶部主事鄧公配安人張氏合塋墓誌銘  
封戶部主事鄧公諱本濟字大用其先江西南昌人  
元季有諱文勝者徙蜀之重慶府巴縣家焉遂爲巴  
縣人文勝生仲英仲英生友紀爲公之父母熊氏生  
男六公其次也公幼有至性在羣兒中特穎異比長  
剛方正直爲里中所尊信非其人不妄接一言好觀  
書獨領大義開口論世事詞鋒捷出終日亶亶聽者  
恣倦以其才識幹蠱於家日用饒裕尤精九章算法

人競慕之初未有子命工塑神像祀於真武觀曰非  
不能祛俗精誠所感固有之也且安忍俾宗祀自我  
而不續乎及得子愛而教之不少縱長曰卿舉成化  
丁酉鄉進士爲安化縣知縣有能聲次曰相舉弘治  
己未進士爲戶部主事勤慎端恪著稱於時次曰翼  
曰袞皆底成立故鄉人之稱善教子者必以公爲歸  
配張氏同邑名族合德於公每輔公以寬厚鄉人有  
負貸者或欲訴於官則曰財物古人以比臭穢毋因  
是賈旣縱得直所損亦多况未必直耶族人有所恃橫  
侵奪分地者安人喻說以理其人帖帖服不敢復肆

其念其有識大類此至于女紅之精好治家之勤儉  
乃餘事也弘治甲子恭遇上太皇太后尊號覃恩  
公獲晉封安人贈如制誥辭有曰存心篤厚待物  
寬平曰勤儉治內議者以爲兩不愧云公卒於正德  
元年二月初四日享年七十有八先安人生二年安  
人生於宣德辛亥十一月十日先公二十九年卒享  
年四十有八繼配胡氏亦先卒女四李大棟吳曰瓊  
張輔李暢其婿也暢爲郡博士弟子貢孫男十三雍  
參雲耕雲凌雲排雲騰雲餘未名孫女六戶部解官  
將以卒之 年 月 日從其兄扶柩與安人

合塋於西山樊家溝祖塋之原問銘於予予與戶部  
同遊郡庠知鄧爲吾郡著姓而公又著德於族者銘  
之固宜其詞曰 山嶽之秀鍾鼎鬱奇材異產恒傑  
出屹立不動靡疇匹有美如公居少室德亦似之甘  
隱逸開口論事比捫蝨烈烈義方啓紹述厚蓄不發  
未爲失西山之原厥卜吉雙壁深藏林茂密百千萬  
禩如一日

諸孺人周氏墓誌銘

姚江有賢婦曰諸孺人者今致事光山教諭諸先生  
之配也先生之兄欲分異不能止其母乃命即田廬

之羨惡均配而授之孺人間請於姑曰田宅易求兄弟難得寧我輩不足忍失兄弟之心乎姑曰女能是復何言悅而從之於乎世之兄弟爭長競短以亂其天倫者多由異姓之婦故如孺人者不可謂賢耶孺人姓周世家邑之上林鄉大父諱思齊仕江西崇仁令父諱望隱德弗仕好吟咏因自號樂吟而人亦以是稱之曰樂吟先生孺人生而聰慧自少從姆教習女紅即精絕每誦內則烈女傳知婦道既長樂吟擇得先生先生之母多病孺人事之克謹左右不以無故違湯藥必親嘗而後進姑恃以安而先生亦因得

盡力於所當事不內顧卒以所業降於時先生典孝  
光山日橫經坐堂上與四方負笈籩糧之士講解不  
輟時二子皆未成童而紀綱之僕亦無可倚者獨孺  
人綜理家政井井不紊撫庶子不異已出人不知其  
有二母也遇臧獲恩常勝威惟諸子有過失不少假  
借嘗曰子之所以不肖者多母姑息縱之吾可不知  
所戒哉於女則亦以少所誦內則烈女傳授之先生  
歸自光山未及秩滿無餘貲而食指漸增得孺人經  
營不乏絕於乎孺人其賢哉有男二曰紋曰絢皆補  
邑博弟子貢嚮用有期女三孫男一曰應科孫女一

孺人生正統庚申正月二十一日以弘治戊午正月十八日卒春嘗執經事先生於光山與知孺人賢行之槩而光山之家政則所親見者故先生於其卒將卜年 月 日葬於四明太平山之原致書京師謂曰吾亡妻墓中之石非子莫宜銘者乃銘曰 婦主中饋外非所事曰維其相執愆於義孺人之賢壺內之常世則鮮儷適顯其光相彼哲婦不難傾城逸恤兄弟而夷其情孺人之義作之於古銘以藏之世其永慕

處士劉君配孺人合塋墓誌銘



士之崛起赫聲績於時非偶然也其必有深積未食  
報於先而其父兄之教詔又有以督而成之耳弘治  
己未春余被命同考禮闈得一士曰劉蒞者其文  
蘊而不肆未之識也旣撒棘出人競譽之而余亦見  
其謹愿端恪將大受焉者而占其所養宜有所自越  
明年蒞奉其二親之狀泣請銘然後悉其親之所以  
誨誘諄切固有以成之於家也蓋其親處士君諱志  
茂字子英蜀之涪陵人其先元季徙自麻城祖諱信  
忠父諱文俱不曜里人稱爲德門君幼孤無翼之者  
少長即迫公家征繇不克畢志於學然能力自奮振

其簡朴勤約無所矯飾居嘗好涉獵子傳不厭接緡紳大夫論說古今事宜在鄉邑人蟻附之然性勁閑遇非其人雖竟日噤不一開口以是士之賢者恒樂與遊處而其尋常人得交一言若蒙賞拔其教子各因其材性俾從事若菴者則授舉子業曰吾家自上世以來不涉吏議顧多頌德者未有積久而不發盍於子試之乃擇師遣肄業數臨視焉雖甚愛不以小過少恕識者於菴在儕輩固逆知其必能成以有今日矣家雖不豐裕而力嚮義若饑渴之就飲食第二人女兄弟四人皆極力婚娶未嘗計有無曰此吾責

也其飭躬治行類如此娶劉氏亦郡名族合德於君  
君之慕善樂義克從史焉凡交接族姓之內人人謂  
有殊愛不妄語笑壺內之治以其力任之有餘尤不  
妬忌視側室主所生之子菴與芝愛踰已出故里中  
稱婦德者歸之君卒弘治癸丑十二月十八日享年  
六十有九又六年而劉卒爲己未十二月二十五日  
少君二歲時菴初登第奉使道過家未至之先三日  
屬續菴僅及歛也於乎痛哉君有子四人曰芳曰莘  
劉出次即菴及芝女三人皆歸士族菴將從其兄以  
辛酉年 月 日啓君窆於鳳凰之原合塋其母

於禮爲宜乃銘之曰 蓄而不泄孰爲啓之爰自處  
士以培其基其基孔厚在我後人綿綿厥緒于涪之  
濱于涪之濱蔚焉崛起巍巍峻科聿昌其始孰稼罔  
穫孰獵罔特吁嗟處士惟鄉之則

封府軍後衛經歷王公墓誌銘

封府軍後衛經歷王公諱孟慶字善昭其先江西吉  
水人洪武時曾大父入蜀占籍涪陵之樂溫即今長  
壽縣遂世家長壽父宗麒種德好施予初長子宣貴  
封大理寺右評事尋季南爲南京右軍都督府經歷  
復封如其官母周氏累封太宜人公性聰慧於經史

涉獵通大義傍究莊老之旨以兄弟游邑庠乃慨然  
請於親曰鍾鼎山林不皆無也盍各從所志且安得  
置甘旨之養無所用其心乎遂竭力任家政凡米鹽  
細事皆經畫焉覲上以色養其親而下不累諸兄弟  
曰用志不分而後業可勤也以是家用饒裕比兄弟  
仕京師恒資給之故益得各能其官樹聲績公事親  
孝凡可以娛親之心者必極意爲之父疾亟危迫無  
所措公稽顙禱北辰割股爲糜粥以進旣食父忽夢  
若有大呼者三少甦已而瘳偕太宜人壽躋八袞及  
喪葬祭一以禮家居訓迪子孫嚴而有法其周人之

急無或顧計財物神祠之有益於民者則悉倡率脩葺之天順中嘗輸粟助邊旌爲義民給章服繼兄弟各請老于家公方矍鑠相與盤桓林下友愛尤篤晚受 勲封之典里閭之人咸以爲榮曰公之厚德好義天其相之耶弘治戊午二月十又三日卒享年九十有四配鄒氏同邑隱君子鄒文勝之女合德於公先公十又三年卒贈孺人享年八十有一子男二愛國子生任府軍後衛經歷恩成化甲午鄉進士任大理寺司務女二壽英適邑人楊馥孫男三在參在俊習舉子業孫女一宜弟公旣卒之數月司務君將從

其兄卜是年 月

日於縣西磧溪里金字山之

原啓孺人之窆而合葬焉奉大理寺左寺副朱君素卿之狀問銘弘治乙卯余省親趨

朝得拜公床下見公清癯精健言動不苟退而嘆曰是宜享有多福也乃爲之銘曰

忠而養其孰爲學而仕其孰持乃歛其澤而轉於施乃昌厥後以聞於時於乎天寔相之夫奚疑

封戶部員外郎陳公墓誌銘

弘治十有二年八月二十日

封奉直大夫戶部員

外郎陳公卒於家享年八十有七矣其子一經聞訃

將戴星歸從其兄卜塋威鳳山之麓與先太宜人合  
焉禮也乃奉狀諉春銘壙石公諱鼎字彥輝世家閩  
之莆田始祖元佐爲開封府治中生應麒太常寺丞  
應麒生堯治山東叅議堯年司戶參軍堯年生謦兵  
部尚書贈銀青光祿大夫元季倣擾各隱遁厥後公  
之祖得祿入國朝益著姓於閩及以隸籍伍符徙  
蜀家成都今爲成都人公三歲卽失怙獨與母居少  
長悉其世系顛末乃惕然曰非大克振迅自立曷紹  
欲絕之緒遂飭勵檢約玩心書史環里閭之父兄欲  
擇師以誨其弟子者僉歸焉受業函丈恒至百餘人



事母孝凡滌瀝之養燠寒之適左右周悉務得其懽  
心然稟性剛介不肯少爲人屈獨其振窮恤匱之心  
則若忘其不自給者成化丁亥展墓莆田敦合族之  
禮薄歸宗黨咸餽贐有貧乏不能爲禮者公知之併  
卻所贐不受居鄉有貸粟者以歲歉愧負公公召語  
焚其券曰無貽爾累也公好學老猶手不釋卷其子  
一經嘗親指授舉成化甲辰進士爲戶部主事歷官  
貢外郎郎中轉工部聿著時名公初

封如其始受官再封爲今官旣貴矣猶撝謙如故  
曰吟詠不厭性苦愛菊自號菊翁人亦以其早植晚

發類之所著有菊翁稿上下篇梅花百詠和杜工部  
草堂集及古詩兩廣觀風集凡藩臬諸公皆加禮敬  
每歲有司與鄉飲秩節皆敦請爲大賓識者謂有公  
而後不負一時盛典也嗚呼若公者可謂篤厚君子  
壽考令終者矣雖蘊蓄不獲施然所以遺其子者如  
此則亦何必親爲之哉配鄭氏贈太宜人同邑士族  
文昇女純惠慈和合德於公先公十有六年卒得壽  
七十四子三人長一中次一言季即一經孫男五興  
宗興邦興仁興平興榮曾孫男亦如之孫女四曾孫  
女加一銘曰 陳自顓頊派衍莫京或顯而微不隕

厥聲降及司馬爲閩之宗支分於蜀維時之逢有美  
菊翁遡源克紹不顯於時成人有造豈曰成人克昌  
孫子令聞令望聿崇其始嗚呼菊翁肆諧厥積百世  
而下見者斯式

明故治中楊君墓誌銘

應天府治中楊君正德十四年冬十二月朝  
覲京師明年正月十二日遭疾卒旅邸嗚呼惜哉喪  
歸卜葬於鄉道出南京其子弘立衰經奉尚寶卿鄭  
君所述狀諉其父執太常少卿李君屬余銘按狀君  
諱廷用字維賢世家叙州宜賓縣曾祖祖皆潛德弗

耀父諱蘭以行誼重於鄉評母李氏君生而天性穎敏方能食即解屬對句稍長自知嚮學攻舉子業成化壬寅知叙州府事陸公淵之負時望愛君乃薦於董學政僉事石公淮補郡博士弟子負自後益淬礪其業大進弘治乙卯舉於鄉入太學友天下士博洽工文詞名聲籍甚然累未遇人咸嘆異君曰遇不遇命也顧惟自盡其心耳正德辛未會銓曹䟽簡行業出類者授府佐貳及州縣正官遂受

命同知安慶府縉紳知君者又曰君盍少俟顧汲汲就是乎君曰先正謂一命之士苟存心於愛物於人

必有所濟况貳畿郡第恐曠厥職以負民耳人尤重  
之比莅任恒推誠待人無敢慢易於民惟恐不能視  
之如子故事所司清戎僉民丁解軍每軍一人道遠  
者則增其一若瘴鄉恒至秋後起解京師班匠苦違  
鄉土君一處以顧役例官民兩便尤務興民之利若  
於潛山脩吳塘鑿新河足以溉田萬餘頃築太湖石  
潭倉懷寧白龍寺之圩埂所在窪下田不苦水澇其  
盡心民事如此當決訟尤思體察惟恐人負枉有盜  
誣指客戶楊京二兄弟三人爲盜而以寡婦裳衣爲  
寄賊其家婦亦不能辨獄辭已成君當覆覈乃訊之

令寡婦出他裳衣以驗與所寄者無異始明皆釋之  
在郡踰三年每攝郡事若清望江之月夫革懷寧之  
饋遺及潜山里甲之科害人咸感悅故巡撫巡按每  
奏請旌異乙亥考績銓曹當膺 恩典有司勘未報  
越二年擢任應天士民攀轅以留者塞於道計不得  
皆泣去在應天持心愛民不異安慶凡受委稽覈荒  
田賑濟饑民編充徭役人心無不信服者咸恐當顯  
用去忽訃至嗚呼惜哉君性侃直篤於孝友第五人  
尚怡怡同爨所與交遊者皆名賢處家庭凡冠昏喪  
祭悉準家禮人有質問者則亦舉以告之配何氏同

邑處士女與君合德男二長弘道次即弘立年未弱冠而痛泣爲君求永於後君爲不死矣爰爲之銘辭曰仕非才曷行其志才非德曷致其身嗟君心有所養學非爲人隨地以立事因事獲乎民胡未究厥志精神倏浮淪刻辭藏墓中懿行永無湮

愚菴李公墓誌銘

公姓李諱吉安字邦瑞別號愚菴世爲內江人其先出江西之吉水自五世祖六七徙高安歷四世有慶二者又徙楚蜀間至元季曾祖諱添祿昉於富順之龍市徙內江梧溪今遂家焉祖諱觀洪武丙子領鄉

薦歷官師四十餘年以子蕃仕爲兵科給事中受  
封如其官致仕給事郎公父也永樂庚子領鄉薦  
司訓漢中府學會求直言上端本十六策宣德  
改元被召擢給事中秩滿卒時年僅三十七公偕  
諸弟俱幼獨鞠於母黃孺人稍長補郡博士弟子貢  
天順壬午膺貢入成均成化丙戌受官訓導於吳嘉  
定乙未滿考績最擢灋爛華陽王府教授公敦朴  
端凝言無矯飾居官務求盡其職不以位卑不屑其  
在嘉定嚴督生徒課程賴造就者多以科第顯在  
藩府著稱善輔導時將軍構隙公極力匡



救質言比諫且喻以親親謂弗聽已而皆抵罪奪  
爵始悔違公言自後政事一諉於公嘗以小嫌欲易  
妃公歷引往事論其不可得寢久之

王以賢聞得復爵公乃屢辭王固留之屬病革世  
子方在襁褓舉以託公公不得去益悉心匡輔每勸  
誘世子諄諄以讀書崇禮導祖訓爲言世子繼襲  
爵公曰吾於先王之託至是始不負矣且年至固  
當去也因移病王知不可留始聽其歸率諸將軍  
餞之其縉紳士民送者至流涕不忍別蓋公之忠實  
得於上下之心有如此比至家逾二年卒享年八十

有二配

氏男嘉嗣俱先公卒女一繼娶田氏生男

振嗣克嗣女二孫男臺格矩準公廉介沉靜自處必  
以禮義即其教子之嚴尤不以愛弛初至澧即遣振  
嗣克嗣入京師從遊今少宗伯西克紫厓馬先生後  
振嗣以學業著王累疏舉繼公職沮於例則乞授  
章服仍留輔導克嗣舉進士改翰林庶吉士歷戶部  
刑部主事坐累左遷通判岳州尋擢守隨州轉僉憲  
陝西所至礪清脩之操人謂是父是子初克嗣倅岳  
承檄審訊九溪夷獄任法不斂其酋長銜之潛遣人  
至澧投火燎公所居舍見絳服者長丈餘立道旁火

不戢須臾見者遂驚避厥後酋長逮繫獄每爲人言  
公之默相於神人如此又嘗簿責縣簿侵牟糧價簿  
持百金詣澧貨公求庇公奮然厲聲曰是欲吾兒欺  
公賣法耶其教於家惟以勤儉耕讀畏官法爲切要  
平居著述有愚菴稿公卒二年克嗣卜塋於邑西應  
龍岡之原遷前母之柩附問銘於余余與僉憲君仕  
同升知公先輩之風久矣乃銘曰

其位雖卑其志則行隤祥委祉尚利其後人

贈南京刑部主事何公合塋墓誌銘

睢寧令何公以秩滿取道省親於家成化壬寅七月

十八日卒享年五十有八其子璽輩卜是年十二月二十四日塋於邑瓜渚之原未有以誌也越八年配陳卒享年十乃合塋焉父之爲弘治以其子

珊任南京刑部主事贈公如其官配爲安人尋主

事君晉負外郎郎中擢守重慶始奉其先友同邑大司馬王公用敬之狀屬余銘按狀公諱皞字太古別號敬齋世爲楚之公安人曾祖諱興祖祖諱安壽咸以隱德著稱父諱潤母蔣氏繼李氏公生而簡重端慎言笑不苟稍長育德邑膠勵志不少懈年二十九始舉于鄉越明年景泰癸酉就試禮部不偶入太學

益脩其業爲同輩者所推讓已而連試于有司竟落第會廷議簡學行之士補守令公於是得尹淮陽之睢寧時歲大侵人相食公至凡可以振拯者行之無遺力民賴以安有惡少十餘輩伺隙逞毒爲民害人咸目爲虎公召至庭諭以禮法皆知悔禍卒爲善陶河湖幅負數十里舊業於民歲入爲斛者凡幾萬乃爲邳州衛軍冒占民賸納公賦鬻及子女公極力申請諸當道歸於民公宇學舍倉庾日就傾圯公不得已繕築有同官者委輸軍需還懷羨金三百兩暮夜獻公曰此旣出於民不可復散矣公曰不可散於

民獨不可用於官乎方事經營費無所出公之助多矣必欲私之吾心不可欺也人稱其廉其爲政務先愛利每政暇輒單騎循行阡陌察民之疾苦求以安之閔焉如饑渴於飲食尤加意學校每朔望詣講堂飭勵諸生程督其藝未嘗以事廢其在官多致感召之異李家庄社麥有一莖三穗者水南義陳二社麥有一莖二穗者隣邑蝗民莫知所撲滅惟不入公界尋有入陶河茭葦社公齋戒禱於神遂大雨盡斃每值歲旱禱輒雨雨澇禱復霽或以爲精誠德之感孚宜如此公曰亦適然耳有詔巡撫大臣各推訪守

令之操節政績卓異者加禮旌勸時大司馬涑水張公鵬巡撫其地首及公在任滿九年治行如一日旣歸行李蕭然民之老稚遮留者塞途至不得舉步乃競脫所履靴置譙樓其縉紳大夫則掇拾公治績爲十美播諸歌頌今有集藏于家於戲如公者信乎豈第君子矣公性甘淡泊於聲色貨利了無所好或告以過則喜聞譽言輒蹙然不安曰豈吾有以致之耶平居事父母篤於孝愛處昆弟交朋友皆有誠信居官所得惟祿俸或勸其爲子孫計者輒以積德應之其於民有遺愛今去任已久言及猶垂泣思之其配

安人出邑名家恭儉慈慧與公合德子男四長璽次  
璵次琬成化丙午鄉進士次即珊舉弘治癸丑進士  
歷今官有世美焉名位未可量孫男四性忱愷怡銘  
曰 治古之吏奉法循理上下信愛父母赤子降及  
後世聲利紛起計功筭效上官善事乃有如公篤意  
恤民我之所趨非時所奔爰自我始亦自我興赫赫  
皇命貶從後人瓜渚之陽荆郢之鄉載其令德世有  
其慶

明故晉寧州知州牟君墓誌銘

正德乙亥八月吾友長沙府推官牟君陟雲南晉寧



州知州明年四月蒞任又明年六月九日卒享年五十八嗚乎惜哉是年其子泰舉進士歸將卜明年二月二十七日塋雍垠先塋之次屬余銘幽石誼有不忍而不可辭君諱正大字元夫別號繼齋晚更號竹亭蓋思以自勗不受變于俗也祖諱永英贈都察院左僉都御史祖妣冷氏李氏贈恭人父諱倬起家進士累官都察院右副都御史時稱公廉厲風節巡撫山東南直隸名聲烜赫去任旣久人猶知而思之前母胡氏繼母雷氏母王氏君自少英敏與弟諱正初號復齋者隨侍都憲公同師習舉子業自相麗澤如

寒士識者器焉成化庚子復齋舉于鄉甲辰第進  
謂君將競爽已而復齋沒至弘治壬子君始得第正  
德己巳官長沙其在長沙以素服膺庭訓恒嚴于自  
律治獄則務平恕不欲以文深沽名經訊決者退無  
後言屬闔郡人赴愬于上官者亦自懇乞曰願得  
聽斷其見服于人如此瀏陽莅郡號難治民有頑  
逋負賦稅者屬君罪之君推誠化誘不煩刑書竟輸  
服在任幾六年持心如一日撫按者咸疏奏旌異至  
晉寧其政加于長沙蓋民雜夷獠梗化于法非內都  
伍君不夷視其民傾心愛戴州有市官每假公加

其稅自利民弗利莫敢言君酌爲中制委收於佐貳  
悉歸公費公私便之不數月聲績大著已而病革不  
起矣君娶鄴都按察僉事楊公諱大榮之女與君合  
德子男二長即泰次蔡郡庠生女二長適禮部主事  
劉彭年余子也次適陳堦孫男一孫女三君明爽不  
設畛域而篤于孝友撫愛復齋子春甚至今亦育德  
郡庠教子姓惟欲不墜先都憲公遺矩恒書司馬溫  
公四留之言示訓且自警焉君遭疾泰春聞之捷適  
報旣泰蒙

恩歸將及家始聞訃而君柩亦自滇艤舟河濱人咸

謂君之得於天相有如此非偶然也銘曰

士恒患于弗用用恒志莫能讐孰執志而不惑紹往哲之箕裘嗚呼是惟元夫之室昭世德以垂休

明故贈刑部主事栗君封安人衛氏合塋墓誌銘

贈承德郎刑部主事栗君卒於弘治乙丑十二月十七日享年五十有一至正德己卯十二月四日配封安人衛氏卒享年六十八先是其子登官南京刑部主事適當考績銓曹乃取道省母於家踰數月安人即速之行曰汝盡職分顯親揚名孝之大者無以

留戀我爲也比登考績復任不數月而安人訃至矣  
嗚呼惜哉登將歸奉柩合塋於君之墓以君之塋尚  
未有銘乃奉其同官呂郎中所述狀屬於余謂同鄉  
也誼不得辭按狀君諱千鍾字公爵別號直菴其先  
荊州江陵縣人高祖以戎籍隸重慶衛遂家焉今爲  
重慶人曾祖諱必信祖諱茂皆隱德弗耀父諱彥綱  
母凌氏出郡名族君生而穎異甫十歲能記誦稍長  
攻舉子業漸出儕輩時同郡御史蹇公初舉於鄉以  
明戴記聞君執經從之遊會董學政者至簡後秀士  
補郡儒學生君與焉自是業日進爲同輩所推遜每

開科大比輒擬應首薦已而連數科竟不錄人咸曰  
如君之明經乃爾豈科目一第固有命耶君事親孝  
居父母喪塋祭無違禮哀毀幾至傷生稟性惇恪不  
妄語笑尤樂善喜施予嘗有人稱貸於其父貧莫能  
償君請歸券蠲之安人與君合德事舅姑能執婦道  
遇族內尊卑長幼咸有恩禮治家則惟事勤儉君每  
讀書至乙夜不休安人亦篝燈紉績不知倦君偶感  
風疾急未獲勿藥安人稽顙籲天求以身代或勸止  
之曰疾當愈曷至自苦如此安人曰婦事夫猶子事  
父母凡可竭力者所不靳也矧死生之際違他顧耶

後果瘳踰年竟以是疾卒安人哭泣無時因病啖喘  
久之獲愈自君卒安人教子若婦各務耕讀織紵嘗  
泣語登曰汝父之志汝當勉思繼之慎勿忘也比登  
正德辛未舉進士則泣且喜曰兒果能不墜父業惜  
而父未之見耳子二長即登次成女一適知印趙圭  
孫男四長裕民府學生次阜民厚民富民孫女二長  
適府學生胡倫次幼在室君篤學懿行宜有所遇者  
乃未一致用於時而發於子天之篤祐善人固如此  
不可無誌爰序而銘之其辭曰

善無弗報如種而獲遲速維時或有豐約惇恪如君

篤學有聞命兮不偶勵志益勤亦有安人不愧內主  
克相於家如車有輔雖嗇其身厥後乃昌於赫  
寵命光賁幽堂爰爲之銘昭示將來葱葱鬱鬱突兀  
雲猥

山東按察司副使陳公墓誌銘

公姓陳諱嘉謨字良顯別號麻溪其先出江西義門  
陳氏徙居瑞州之高安官塘自某始徙至蜀祖某封  
工部主事父諱仲紀以公貴贈奉政大夫浙江按察  
司僉事母苟氏贈宜人繼母瞿氏封宜人公生而端  
凝穎異聰敏不羣稍長即知嗜學無間祁寒盛暑從



仲父太僕卿希賢先生受業領成化戊子鄉薦明年  
會試弗偶卒業胄監時仲父官工部公依之偕廣東  
舉人吳裕者游莆田陳音先生之門先生以明經負  
時望海內之士執經質問者盈室而公與吳尤出類  
作爲時文數十百篇學者轉相傳誦壬辰偕吳舉進  
士公首列有司刻其文式後學已而補令西華克行  
其所學廉慎英悟六事無廢弛又以其餘力爲諸生  
講授多取科第者如知府綦江劉定昌主事莆中廖  
天章副使西華李澄叅政新蔡曹鳳其最也遂以己  
亥徵擢監察御史甲辰巡淮揚河道兼理鹽法風

裁震蕭豪家戚里之怙勢以罔利者計無所容乃飛  
毀謗謗不忌比還朝因有廣西試僉事之陟故事  
文階遷轉第論資望未有應遷而試者有之止於御  
史耳而藩臬方面絕無時中傷者欲假擢置公郡貳  
而冢宰濟南尹公執不可乃加試以處之自後試亦  
未嘗行也其在廣西值鬱林猥獍逞毒出師公督餒  
紀功親披甲冒矢石不避且爲之撫綏其脅從者事  
平賜文綺白金旌其功尋以憂去弘治服闋轉浙  
江整飭溫處二府兵備釐奸擿伏布以大和鉤然著  
聲稱繼裁革改山東督理屯田於畿輔諸郡嚴而不

苛明而不察軍民賴焉丙辰擢山東副使爲天津兵備益盡心興革利弊翕然稱便而亦以是多忤人陰有肆其讒言者賴公名素著屹不動未幾竟以疲於職務遘病乃疏乞歸不待報登舟至臨清不起矣時已未夏月日也配李氏封宜人出邑名族側室嚴氏男三長錫周先卒次塏堦女三長適進士鮮冕次適張堅二女及錫周出宜人次幼在室與塏堦皆側室出也公享年五十有六宜人貞靜淑懿與公合德翼愛二子不異已出雖公卒尤篤至恒擇師教之其治生植產思爲其地者不遺餘力公當瞑目矣

公卒之二年始從先兆塋于東山之麓其子幼墓石  
未有銘又越七年其從弟貳守良臣率垆堦以見屬  
余家與陳世通姻好而余於公雖後進知爲悉公外  
和內剛言笑溫裕人樂與親又以經業四方學者皆  
競慕其名若謂煦煦儒者也至其施於政事自縣邑  
登臬司出入法從所在職辦一時論藩臬之賢如公  
不多屈指於是又信其非分章析句之士也乃實志  
而沒惜哉余方爲鄉黨動梁木之悲而垆堦有請誼  
不可辭乃爲之銘曰

古之爲士窮經致用降及後世詞章記誦其進有階

東川集卷之十一  
三  
棄如弁髦靜言庸違亦或崇高乃有如公致身明經  
煌煌厥績揚于

王廷揚于 王廷惟 帝簡命絲綸有章荐膺  
寵任豈曰不顯孰爲之啓而止于斯東山之麓體魄  
歸藏載德有文其永無疆

明故江孺人魯氏墓誌銘

孺人姓魯氏其先江西廬陵人

國初高祖以富室取至京師隸籍留守左衛故世家  
應天上新河父處士諱潤博覽群書以禮義檢身隱  
德弗仕士大夫咸相與交遊母 氏孺人生而貞靜

端肅爲父母所鍾愛稍長解識字於女紅少暇即喜閱傳記見都人俗尚冶容服飾心恒鄙薄了不以爲意與妹三人篤友愛雖簪珥皆相共不分爾我處士無嗣乃獨賢之謂其母曰是女克承我後何必子也須爲擇配父之得素齋姓江氏諱鳳亦江西清江人占籍金陵父母蚤喪篤行狷介鄉士大夫咸重之處士遂館以爲甥孺人內則孝於親外則克相其夫以成其家凡族親婚喪慶弔之事皆爲之處分每竊嘆未及事舅姑遇春秋享祀必致其豐潔曰舍此無以竭其心也性好施予夏則設茶以救人之渴冬則設

粥以濟人之饑而於鄉閭之貧乏者即調給毋少靳  
篤於教子諸子知句讀即請於素齋求明師教之夜  
則焚膏油以助其勤故正德丙子長子鎮中順天鄉  
試次子銳中應天鄉試人咸謂孺人之教也二妹孀  
居則每致贈遺以爲助當會集常語古今節行之事  
以風厲之生子男三長即鎮銳次鎧女二長歸南京  
兵部陳尚書之子汝嘉次歸監察御史王以旂孫男  
三惟淮惟河惟洲孫女四尚幼嗚呼若孺人者上能  
相其夫下能教其子而庭內禮義雍睦其賢可知矣  
正德戊寅倏以疾卒享年五十有九時十月十有四

日也將啓手足不亂但顧諸子曰我無所慊於心惟  
母老無可託耳汝輩當念之素齋於孺人歿皇皇然  
如失左右手其助於內者不少也鎮輩卜以庚辰八  
月二十八日塋於

之原奉龔郎中所具狀請

銘幽石余知素齋者不可辭銘曰

婦人之行不出閨門積中著外哭焉獨存吁嗟孺人  
壹爨肅肅懿行之脩惟古思淑銘以藏之厥後弗諼  
百世而下孰不賢賢

明故明威將軍施州衛指揮僉事童君墓誌  
銘



施州軍民指揮使司指揮僉事童君寢疾軍民奔問者無虛日至有刺刃於膚爲禱者旣革不起則號泣如喪考妣時正德丁卯三月十五日也享年六十一於戲君何以得人心有如此哉君自少受學於歐陽先生希績天順丁丑弋陽黃公溥以四川按察使謫施州復從請益故其在軍臨事不但卓越流輩而已君天性仁厚人號爲童佛子成化庚寅始襲父職遂用薦握衛章諸弊政一切釐革已而兼督屯種先是施人務火種一遇水旱租稅連歲逋負君始教之蓄水墾田自是皆以時獲尋兼督操練軍士乃講求

諸葛武侯之八陳衛公之六花使之演習於是士知  
有戰陳之法弘治初部民扇惑寨峒弗靖君親往諭  
以逆順禍福民即散歸業乃追奪其僞夏所授忠信  
軍民都元帥印及告身民相率頌之曰童公活我父  
母也桑植安撫向世英欲害其從子白嘴俾亡命崇  
寧里誘脇諸峒蠻劫桑植族滅世英奪其印竊據銀  
山嶺事聞於朝遣藩臬重臣調漢土軍數萬往征  
君督軍餉未嘗乏久之僅獲其爲從者君跡知白嘴  
俾匿施南宣撫司境乃率其弟瑛瑜召宣撫覃太調  
土軍千人圍其巢穴賊潰圍出君追至母湖峒賊困

闔莫敢前君率衆鼓譟夾攻遂生禽之及其首惡巡撫謝都御史綬奏上其功 賜文綺四匹白金五十兩已而謝政家居居七年當道者復從民欲檄蒞衛事兼管操練是歲有虎患人莫能捕君禱於神往捕即獲捶把峒長官向捶把踵者爲永順宣慰彭顯英所害奪占其地三十餘砦其妻遺腹生子恭斌長疏于 朝令分巡分守官體量多納顯英賄右之惟君不爲所制數以情爭之不得則曰永順之富聞於京邑恭斌之貧不能自存某豈私於恭斌耶守巡復以恭斌及其家口百餘指付永順君又力爭曰恭斌乃

永順之所欲甘心者今又俾爲之民九原之下何所  
赴訴邪守巡直其言釋之秦斌之家得不死者君之  
力也唐崖長官覃彥實以桀驁聞官至其地輒避不  
出惟君去則迎於道左曰我公秉衛政蠻民恃以安  
業非他輩可伍也出則男女聚觀曰此阿寵所敬者  
我輩其敢慢耶阿寵者猶言我官也於戲如君者其  
操心勵行如此豈可例以武弁視之耶君諱璋字國  
瑞其先出廬州之合肥自其高祖諱寶者從

太祖開國累立奇功授管軍萬戶從征蜀沒於軍贈  
鎮國將軍都指揮同知曾祖諱勝累官廣西都指揮

同知祖諱輔襲指揮僉事調施州遂家於施父諱鍾  
嗣職以長者稱嫡母馬氏封恭人生母呂氏早卒君  
鞠於恭人娶陳氏三山處士以亮女與君合德子男  
六曰景晃景昂景旦女一適杜指揮子宗璞孫男三  
長希高餘尚幼孫女四君與諸弟友愛篤至見諸弟  
必盛服延坐與語旣入仕以子姓蕃衍別營居室而  
讓其舊第於諸弟或沮之君曰某幸嗣前人休緒惟  
當謹禮守法以求無隕墜安在固守居第爲賢耶永  
順族人得有得水西馬者名麝香青其直百金一夕爲  
姪牛觸傷死人咸恟懼不敢言君知之但命作脯給

諸族人其爲政務教化諸峒夷俗父兄死則收其妻  
妾君嚴立條約禁之復立學擇師以教鄉之子弟而  
親勸懲其勤惰者俗爲之稍變蓋自君蒞事民安盜  
息數爲按治者所獎勸以激勵諸衛君旣沒杲將卜  
以 年 月 日塋於藥山之陽乃至京師  
丐地官主政黃君鵬舉屬余銘於墓石余未識君然  
觀於杲蓋有文而能世其業者遂爲之詞曰

文武之塗世岐爲二絳灌隨陸紛紛訾議有如君者  
亦胡不宜治民靖亂有赫其施其名之長其德之厚  
螭螭簪纓尚利於後

明故資政大夫南京工部尚書洪公墓誌銘

正德己卯六月二十有四日南京工部尚書洪公卒  
于官享年七十維時哭吊者相繼咸曰老成凋喪嗚  
呼惜哉先是二月公以南京都察院右都御史三年  
奏績入京至中道聞轉工部遂抗疏辭荷

溫詔勉留有曰清譽素著不必再辭赴任越三日即  
具疏又辭踰月忽病革不起矣已而疏下亦不允其  
受知於上如此公諱遠字克毅別號弘齋系出唐  
河北黜陟使經綸之後至十一世祖諱中孚者宋少  
師禮部尚書世家休寧之黃石又至諱大六者始遷

歙之洪源今爲歙人祖諱壽隱德弗耀父諱寬明經  
領鄉薦歷知桂陽鄭州皆以公貴贈南京都察院右  
都御史祖妣江氏妣汪氏俱贈夫人公少負至性稍  
長篤嗜問學刻意爲文殊有理致補郡博士弟子貢  
即舉於鄉成化戊戌舉進士出知莆田縣踰年丁汪  
夫人憂守制甲辰服闋改濬縣又二年丁鄭州憂守  
制起復改交河縣皆有惠政及民時巡撫先史都御  
史琳暨御史按治者咸交章舉旌異弘治甲寅被  
召擢南京福建道監察御史庚申遷浙江按察司副  
使奉 璽書巡視海道正德丁卯以裁革調湖廣已



也擢廣西按察使明年擢四川右布政使未幾轉陝西左布政使擢都察院右副都御史奉

璽書巡撫雲南越二年改南京大理寺卿乙亥轉南京都察院右都御史其歷官循資叙遷如此公忠直端諒風範端嚴事父母孝丁家艱哀毀踰禮每赴官過家上父母塚涕泣如雨與兄弟相友愛其守官則清慎勤三事終始不渝初仕莆田號劇邑多勢家請託公置鼓廳事後凡士大夫有造焉輒鳴鼓三群吏環侍執事故或有私謁者自毋出聲莆濱海寇常竊發巡海者懼失機檄僉民兵代戍公慮貽害於民力

沮在漕交河治如莆田有加焉民之愛戴者亦不異  
值歲大侵則出公廩極力賑救民賴全活議者有以  
漕里多欲分隣湯陰者屬之民懷戀公雖以刑驅不  
欲去後竟不果分其爲御史數言事如抑異端以守  
成命弭人怨以全貴戚辨邪正以定國是勤脩省以  
回天變及事干權幸者亦觸忌諱言之時吏部尚書  
倪文僖公負才望於官僚少當其意獨公爲所器重  
其執憲浙江歷巡五道搏擊豪右撫綏良善人稱得  
體屬兩浙大饑公分賑嘉湖二府乃參酌富鄭公青  
州救荒法朱文公浙東荒政行之得無流殍今都御

史王公璟時巡視既其績於朝賜羊酒犒勞在湖  
廣亦歲饑工部侍郎畢公亨以奉

勅賑濟擇人分任其事公所任半楚地亦如在浙賑  
之在陝西四川適寇盜充斥軍務填委公所處以給  
餽饒者無或乏仍積羨餘數千緡貯公帑在雲南謂  
夷人弗靖非無所激乃加意黜貪獎廉以懷輯之夷  
人服公威德咸革心嚮化舊十八寨爲夷人所據不  
時肆掠至是咸出降不敢縱肆虐民有欲乘機擊之  
以要功者公以殺降不信戮及平民不仁襲其無備  
不武不聽寨人竟亦未嘗梗化其功業所至不但得

於民如此至統理憲臺則務持大體恒戒諸言事者  
母事詆訐能舉職者必加與進有御史林有年者諫  
取佛被逮繫公苦其遠行無所給資以月俸復率諸  
御史上疏救之其秉志勵行如此跡古所謂良吏豈  
有異耶配吳氏繼程氏皆出名族與公合德先卒累  
贈至夫人子男四長伊舉人次价國子生次脩爲司  
務兄後次佺郡學生女三長適吳御史瀚之子揖國  
子生次適胡給事中煜之子埴郡學生皆吳夫人出  
孫男五詔誥訓誨謹孫女皆幼在室公旣殯其子伊  
等將扶輅歸塋歛之覆鍾山之原爰奉少宗伯楊公

所叙行狀屬余銘諸幽石余嘗與公先後遊姚江少  
傳謝公門蓋知公者乃不辭而系之以銘曰

於維憲臺綱紀之司繩違糾慝百僚其儀繁公崛起  
歷躋膺仕聲聞四馳初終一致乃總憲度簡在  
帝心復晉厥秩邦土式欽居寵之思懇辭由衷

溫詔特頒願莫之從曾未踰時溘焉淪亡生榮死哀  
卹典煌煌覆鍾之原體魄斯藏考祥視履著此銘章

明故淑人胡氏墓誌銘

淑人胡氏世家蜀重慶府巴縣父諱深舉天順丁丑  
進士仕戶部郎中思州府知府母 氏淑人生而穎

敏莊靖爲父母所鍾愛稍長每求聘於名族不輕許  
會同縣布政蔣公偕公同年舉進士爲其子求聘乃  
許焉今提督南京糧儲都察院右副都御史一菴也  
淑人于歸時一菴毓德學宮凡閭內事所當爲者淑  
人竭心力爲之不以分慮於公事舅姑孝敬每飲膳  
必手自烹飪不假手婢僕而亦未嘗或爲他務所移  
每歲時祭祀若籩豆酒漿之奠一親視之務思精潔  
或不及視則心若惘然矣子三人自幼教之檢身循  
禮未嘗或溺於愛以養成其驕惰之性稍長則請於  
一菴擇師就學今長弘仁次弘義弘勲咸習舉子業

有成待舉於時女二課習女工訓以勤儉孝養未嘗縱之嬉戲長歸重慶衛指揮汪恩次歸柳指揮蔭襲子武視諸婦如女每教以婦道諄諄不倦或有少違恒優假之如所生焉以是諸婦益思謹恪無敢少忽孫男五汝莊汝和餘尚幼孫女四淑人秉性謙約而樂於施予親黨婚喪必思助之族有孤女貧不能存者淑人留育於家爲治裝擇配以嫁撫臧獲有恩恒體恤其饑寒而亦未嘗不御以禮法或遣他出經月必令女婢與婦偕處一室其謹飭周閑於家如此余與一菴少同學多資麗澤焉繼同仕京師一菴結爲

姻家弘仁即余婿也故知淑人治於內以助一菴者  
不少弘仁以正德己卯舉於鄉是歲冬即趨南京定  
省踰月會試禮闈明年夏方還京卒業南京太學淑  
人忽以疾不起時五月二十五日也嗚呼可勝悼哉  
一菴入仕淑人初封孺人繼封宜人恭人今又將  
膺恩封之典而倏逝然所已被者固不易矣弘仁  
輩將扶柩歸卜月日塋於之原乃奉尚

寶卿鄭君有容狀屬余銘誼不可辭銘曰

吁嗟淑人慈嫻沉默壺儀之脩宜家維式孰無舅姑  
事得其心孰無子女教之克勤婉婉庭內惟孝惟敬



外無所覲自得其性宜壽而康胡不百年瘞辭幽石  
以承其傳

明故鎮國將軍錦衣衛都指揮同知白君墓

誌銘

錦衣衛都指揮同知白君諱竣字崇之別號慎齋上  
世出洛陽宋季有諱繼昇者始徙常州之武進今爲  
武進人曾祖諱思恭隱德弗仕祖諱珂仕爲大冶教  
諭俱以君父貴累贈爲光祿大夫柱國太子太保刑  
部尚書曾祖妣蔣氏祖妣鄭氏繼王氏俱累贈一品  
夫人光祿大夫柱國太子太傅刑部尚書贈特進太

保謚康敏諱昂者則君父也母蔣氏累封一品夫人  
公性資警敏自幼癯弱弗克究心於學稍長始涉獵  
書史甫弱冠康敏公即命主家政至成化癸卯乃用  
輸粟例授七品散官丙午復輸粟授蘇州衛指揮使  
尋加授浙江都指揮同知正德癸酉以從征蜀寇及  
錄康敏公平海寇功詔授錦衣衛世襲千戶甲戌  
江西桃源峒盜起出師君承命叅戎事有功晉錦  
衣衛指揮同知視事南鎮撫司丙子又以納級例擢  
都指揮同知被賜蟒斗牛衣三襲暨通鑑諸書明  
年以母夫人年高三疏乞終養詔特許之仍

命乘傳歸蓋此出於異數前無是比也尋塗次聞母夫人訃哀毀踰禮比至家恒以弗及見母痛恨鬱抑又舊病脾遂加革乃於八月二十二日卒距其生天順己卯十二月二十九日享年五十有九嗚呼惜哉君負才識當主家政凡規畫調度咸有操術臧獲老少各事其事無遊惰者故生業日充拓康敏公因是益殫心於公而忘其私嚴於祀先居第東創建祠堂每臨時祭必潔牲醴享焉又禮耆儒纂輯族譜以合族屬縉紳大夫莫不重之性孝友康敏公居京師凡鄉土所產珍味必以時致無或缺又預築一圃疊山

鑿池構亭於中環植奇花異卉扁曰歸樂以爲康敏  
公退休之所旣歸則日延族舊陪侍觴咏以適其意  
蓋無所不用其心者處第都御史圻季司務坊友愛  
甚篤康敏公蔭官例應屬君乃以公恒念猶子垣早  
孤即固讓不少靳人尤難之其局量弘深與人交久  
而益敬凡士大夫咸樂與之居官克慎當從征則恒  
率家丁奮勇戮力多著勞績故每晉秩人無或疵議  
嗚呼跡君世家所以檢於身以達於官焯焯如此固  
宜享有名秩以流澤於後也配楊氏有賢行封夫人  
子男六長諫太學生先卒次詔鴻臚寺通事次詡誠

訖皆太學生次譜孫男六倍儼仲偁儲偁君卒踰年  
其子詔等卜歲之巳卯十一月 日奉柩窆於

之原以其同邑禮科右給事中毛君憲狀屬余  
銘諸幽石銘曰 世祿之家鮮克由禮不變於俗允  
矣君子嗟君懿行出類殊倫敬宗慕譜辭蔭承親奮  
其才猷以登仕路若古卜式跡非獨慕荐服顯秩  
寵命煌煌世載其美垂裕流光刻銘幽石於卜新阡  
弗磨弗泐以永其傳

明故應天府府尹胡公墓誌銘

正德庚辰夏五月望後一日應天府府尹胡公卒享

年六十有七時方多事上下咸倚辦焉倏聞自公卿大夫而下莫不悼惜謂爲一時之賢也公世家陝西扶風魯祖亨祖仝贈亞中大夫光祿寺卿魯祖妣氏祖妣氏贈淑人父諱恭大中大夫光祿寺卿母李氏封淑人公諱宗道字守正別號溫泉生而穎異九歲即解屬文成化辛卯補扶風儒學生董學政伍副使福奇之改補鳳翔府學時年十八遂以春秋舉鄉試第五世所僅有也辛丑舉進士初授戶部主事務守法惠民監收金鰲兒壩芻束有權貴家託以浼惡不堪者公不從踰數日公自壩歸京忽挾凶器者

馳二騎逆至從者驚謂殆惡人耶公視之語曰汝非  
前日壩上所見某乎茲來何爲若以我不從所囑任  
加害也從者駭散其人乃下馬伏前曰無他以路多  
梗來護送耳公曰即護送宜隨後何迎而來二人語  
塞公乃令去至京言於部逮繫寘諸法其執法不畏  
強禦如此後擢負外郎郎中此心終始無少渝弘治  
丙辰擢知襄陽府襄陽在楚稱劇要公至一以恤民  
爲心不擇利害爲趨捨薄城爲漢江舊以小舟渡日  
至萬人往來者病之公造舟七十爲浮橋至今如履  
平原有盜假僭稱號流劫鄉村公訪知應捕人陳漢

烈者素謀勇乃授以方畧擒之其害獲除正德己巳  
守制起復轉真定府踰數年陞四川布政司叅政時  
流賊充斥上命刑部尚書錢塘洪公鍾總制起都  
御史莆田林公俊巡撫公分守川東道乃僉民兵千  
餘人聞勇士何定者亦素謀勇令率之截捕後果多  
獲功尋擢右布政使比賊平總制諸公奉

勅獎勞賜綵段羊酒者再銀牌一甲戌轉左布政使  
上賜衣一襲白金一錠晉俸一級爲正二品以平賊  
給饒功也公自入仕於法不敢少違而自守尤清慎  
所至未嘗隨例罰紙故凡巡撫巡按者無不䟽請



旌異在蜀舉薦者尤多有曰誠實之心不失赤子水  
藥之操可方古人士論信之在襄陽嘗病目召醫張  
安治療有富民袁祿者毆殺人介安懷金賂其少子  
鳳韶爲之地鳳韶叱出翼日又至鳳韶白公執之索  
金出於身遂抵安罪袁祿竟坐法公孝友出於天性  
官戶部侍郎光祿公京邸母淑人多疾公恒不違左右  
母恐悞朝叅強之就寢輒勉從私俟於外聞少呻  
吟卽趨入問候凡羹飯湯藥皆親視具在襄陽母淑  
人訃至痛毀幾不能生四日後始飲水比奔喪徒跣  
就道踰五日足腫不能行強爲馬代及家公就養光

祿於內治喪於外無不竭其心力思無少悔焉繼服  
闋光祿促起復公念親年踰七十豈能須臾違光祿  
固遣之至加怒公故假託延緩踰年光祿亦稍館得  
視含歛若有以啓於衷也公與弟友愛甚篤仲叔二  
弟先卒撫其孤如已子當治屋宇時則盡出所有俸  
貲經理不少靳二親終欲分析不能違則先擇所優  
以處亡者之孤次及季弟取之而後居其一僅足蔽  
風雨人以爲難配杜氏出同縣右族累

封恭人子男四長鳳庭以舉人仕河南新安知縣先  
卒次鳳岡秦府典膳鳳岐鳳韶皆業儒女四孫男六

長昷次星旦是餘幼嗚呼若公者其操心飭行人無  
不知方膺柄用而僅止此可悼也已子鳳岐輦將扶  
柩歸卜以 年 日葬於 之原乃奉府  
丞寇君所具狀請銘余蜀人蓋稔知公者銘曰  
心有所養外無所惑岐路紛馳厥趨靡忒嗟公懿行  
克脩於家荐升仕路惴惴無華職思其憂心惟報  
國期獲乎民而罔培克宜壽而昌以究其施溘焉而  
逝君子之悲

明故戶部主事蕭君墓誌銘

君諱輔字以忠姓蕭氏別號主靜其先湖廣麻城人

始祖諱仲誠元季避兵入蜀之富順鴻鶴鄉因家焉  
今爲富順人仲誠生德榮德榮生文昌文昌生韶君  
之祖也力學自脩里選育德邑庠辭不獲徒步徑詣  
京師始得謝歸其不慕仕進有如此繼師塾一以朱  
子小學設教徃徃多名士出焉至今猶傳其法云考  
處士諱希績剛毅謹恪質直簡默有古人風母熊氏  
君賦性英敏宏博讀書日能誦數千言爲文不務艱  
深刻削每試有司輒第高等而處之恬然不自矜衒  
曰讀書真將以決科耶人以是賢之其教人善於誨  
迪遊其門者咸底於成如舉人能載何鍾進士鄧萬

斛皆執經受業者也成化丙午熊孺人卒哀毀踰禮  
凡殯殮一依文公家禮雅善琴亦好之自是絕不御  
者三年弘治乙卯領鄉薦登己未進士時處士年已  
踰耄君疏乞歸省格於例乃復以疾謁告居家侍養  
者三年及卒執喪不違禮乙丑冬服闋起復得授戶  
部福建司主事戶部金穀之司宿弊不可梳剔君以  
初釋褐居之而在事馭吏寬嚴有體人無所售其奸  
故自大司徒而下多器重之未幾簡委分督通州軍  
儲未踰歲而捐館時正德丁卯五月十三日也享年  
五十有五元配陳繼配徐子男四長性次道皆習舉

子業次教次智孫女二尚幼教智徐出君卒踰月道  
將扶柩歸卜明年月日塋於茅嶺祖塋之次  
乃奉鄧君汝庸所爲狀謁予請銘汝庸即前所稱進  
士也予嘗聞君以晚始踐仕途而親不獲祿養仕不  
及盡瘁爲兩愧故有兩愧詩其志行可知也而仕復  
不久尤爲可悼因叙其事而爲之銘銘曰  
祿非不慕志可究也仕非不能時先後也是爲兩愧  
內何疚也

曹母陳孺人墓誌銘

孺人姓陳氏世爲重慶名族父諱善前母氏母趙

氏孺人年十八歸於同郡冰崖居士居士姓曹諱文德其飭躬治行之懿著于鄉閭余故嘗誌之孺人則合德而能助於內也子三長曰勛司訓安福次曰儉次曰勅舉進士爲刑部主事女四皆適士族璩宗甫張憲梁臣左贊其婿而憲與贊補郡博士弟子負孫男三曰沔汰汴孫女五長亦適人餘在室孺人生有至性慈慧幽淑旣嫁能孝養其舅姑姑楊性峻急孺人曲爲承順得其懽心事無大小自少至老一母敢專制故楊每稱以厲諸婦曰事我當如此處妯娌如同氣門內雍睦不見踈薄以是冰崖偕兄弟四十年

同一爨雖旣老猶不忍分異子雖愛未嘗不以學業  
勵之每勛勅讀書至夜分孺人必續於傍無倦色其  
敦睦姻族周恤里隣咸有恩誼嘗有喪不克殯者孺  
人知之亟襁以衣又有貧婦以子多饔飧恒不得厭  
孺人推食與之其好施予類如此以正德元年十有  
一月九日卒後冰崖四年享年七十八祔塋冰崖之  
墓于龍濟之白沙溪銘曰

孰不爲婦兮亦孰非母嗟孺人之內行兮曷靡篤厚  
克啓其後兮亦貽令名白沙之藏兮尚有遺榮



東川劉文簡公集卷之十八

終